




ILIDŽA

INFORMATIVNI BILTEN OPĆINE ILIDŽA
Ilidža • Septembar 2015 • Broj 141




REDOVNA SJEDNICA OPĆINSKOG VIJEĆA

Poslovna zgrada Općine dodijeljena još dvije godine MUP-u

Općinsko vijeće Ilidža na 31. redovnoj sjednici donijelo je Odluku o dodjeli u zakup poslovne zgrade u vlasništvu Općine Ilidža. Tom odlukom dodijeljuje se u zakup Ministarstvu unutrašnjih poslova Kantona Sarajevo za potrebe Četvrte Policijske uprave-Policijske stanice Ilidža, poslovna zgrada u vlasništvu općine Ilidža ukupne površine od 1051,78 m² skupa sa parking prostorom, koja se nalazi u Ilidži, ul. Samira Čatovića Kobre br. 1. Poslovna zgrada dodijeljena je u zakup na period od dvije godine, a zakupnina iznosi 4 KM/m².

Imenovana Komisija za utvrđivanje i obilježavanje granica katastarskih općina

Općinsko vijeće donijelo je i Odluku o imenovanju komisije za utvrđivanje i obilježavanje granica katastarskih općina. U sastavu Komisije za utvrđivanje i obilježavanje granica katastarskih općina na području općine Ilidža su: Džemila Vručak, Emina Musić, Haris Hadžić, Ale Čatić, Vinko Tomić i Suad Mutapčić.

Podrške radu ustanova kulture od općeg značaja i interesa za BiH

Općinsko vijeće Ilidža na ovoj sjednici donijelo je Odluku o davanju odobrenja na Memorandum o razumijevanju s ciljem podrške radu ustanova kulture od općeg značaja i interesa za BiH za period 2016 - 2018. godine i Aneks broj 8. Memoranduma o razumijevanju s ciljem podrške radu ustanova kulture od općeg značaja i interesa za BiH za period 2016 - 2018. godine. Tom Odlukom Općinsko vijeće Ilidža daje odobrenje na potpisani Memorandum o razumijevanju s ciljem podrške radu ustanova kulture od općeg značaja i interesa za Bosnu i Hercegovinu za period od 2016 - 2018. godina kao i na Aneks broj 8. Memoranduma o razumijevanju s ciljem podrške rada ustanova kulture od općeg značaja i interesa za Bosnu i Hercegovinu za period 2016- 2018. godina s ciljem podrške radu ustanova kulture od općeg značaja i interesa za Bosnu i Hercegovinu. Općinsko vijeće zadužilo je Općinskog načelnika da prilikom izrade Budžeta Općine Ilidža za 2016., 2017. i 2018. godinu planira finansijska sredstva u novčanim iznosima od 50.000,00 KM za svaku budžetsku godinu. Iznosi Odluke zavisit će od finansijskih mogućnosti Općine Ilidža i cijenit će se prilikom donošenja Budžeta za svaku budžetsku godinu.

Donesena Odluka o usvajanju i provođenju RP "Doglodi"

Općinsko vijeće Ilidža je na 31. redovnoj sjednici održanoj 30. septembra u Multifunkcionalnoj sali donijelo Odluku o usvajanju i provođenju Regulacionog plana „Doglodi“. Površina obuhvata je 96,3 ha. U obuhvatu Plana definisana je zona stanovanja sa pratećim sadržajima. Prostor u granicama Plana graniči sa sjeverne strane sa 13. transverzalom, sa istoka Poljoprivrednim dobrom Butmir, a na južnoj strani nalazi se potok Dobrinja. Trenutni građevinski fond unutar obuhvata utvđen je putem anketa provedene na terenu gdje je evidentirano 918 objekata.



Imenovana i Radna grupa za očuvanje nacionalnih spomenika BiH

Općinsko vijeće Ilidža na posljednjoj sjednici donijelo je Odluku o obrazovanju Radne grupe za očuvanje nacionalnih spomenika BiH na području općine Ilidža, kao povremenog radnog tijela Općinskog vijeća, a utvrđen je i njen sastav, nadležnosti i način rada. U Radnu grupu imenuju se Midhat Karić, Amir Džafo, Faik Hadrović, Sabina Viteškić, Goran Kapor. Zadatak Radne grupe je da obavi sve potrebne aktivnosti i ostvari saradnju sa Komisijom za očuvanje nacionalnih spomenika BiH, a sve sa ciljem da nacionalni spomenici na području općine Ilidža budu u funkciji razvoja kulturnog turizma.



Izveštaj o radu i finansijskom poslovanju JU KSC Ilidža

Općinsko vijeće je na sjednici usvojilo Izveštaj o radu Javne ustanove kulturno-sportski i rekreacioni centar Ilidža i Izveštaj o finansijskom poslovanju za period 1. januar-30. juni 2015. godine.

Kulturno-sportski i rekreacioni centar je Javna ustanova od posebnog društvenog interesa čiji je osnivač Općina Ilidža, kroz čiju se programsku aktivnost i djelatnost zadovoljavaju potrebe stanovnika i udruženja sa područja općine Ilidža i šire u oblasti sporta, kulture i rekreacije. U tom pravcu učinjeni su značajni naponi na poboljšanje uslova za održavanje kulturnih i sportskih manifestacija od lokalnog, državnog i međunarodnog značaja. Aktivnosti u izvještajnom periodu realizovane su u objektima univerzalne sportske dvorane, dvorane za borilačke sportove, otvorene sportske plohe, ljetne pozornice i multimedijalne sale, a odvijale su se kroz nastavu sporta, utakmice, treninge, rekreaciju, sportske i kulturne manifestacije. U proteklom periodu izvršena su značajna ulaganja u nabavku opreme i sanaciju objekata, a ostvareni su pozitivni finansijski rezultati.

Data podrška inicijativi za donošenje novog Zakona o turističkim zajednicama i promociji turizma na nivou Federacije BiH i

Na sjednici Vijeća bila je i Informacija o provođenju Zakona o dopunskim pravima boraca/branitelja BiH Kantona Sarajevo koju je vijeće primilo k znanju i Informaciju o stanju turističke ponude općine Ilidža sa prijedlogom mjera za njen dalji razvoj sa naglaskom na razvoj kulturnog turizma. Predloženo je daljnje ulaganje u infrastrukturu, poboljšanje pratećih uslužnih servisa, te promociju turističkih resursa kroz prezentaciju učešćem na sajamskim manifestacijama. Data je i podrška inicijativi za donošenje novog Zakona o turističkim zajednicama i promociji turizma na nivou Federacije BiH i donošenju Zakona o turizmu Kantona Sarajevo uz zaključak da se u cilju poboljšanja stanja u oblasti turizma na području općine Ilidža održi tematska sjednica Općinskog vijeća. Vijeće je na sjednici primilo k znanju i informaciju o stanju u oblasti pružanja besplatne pravne pomoći za period od 01. januara do 30. juna 2015. godine. U ovom periodu za pravnu pomoć obratilo se 437 lica, od čega 265 za sastavljanje pismenih podnesaka i 172 za usmeni savjet. Pravna pomoć pružala se građanima u zaštiti i ostvarivanju njihovih prava iz radnog odnosa, invalidima, borcima, šehidskim i porodicama palih boraca, žrtvama rata u ostvarivanju njihovih prava, zatim licima u stanju socijalne potrebe u zaštiti i ostvarivanju njihovih prava i u drugim slučajevima u kojima su građani oslobođeni plaćanja takse u postupku pred državnim organima.

Prijedlozi akata o regulisanju imovinsko- pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Avdić Sadike, Kajmović Muniba, Smajlović Muhameda, Asotić Jasmina, Husejinović Salima, Ibišević Saliha, Bibović Mustafe i Rastoder Nuška. Usvojeni su i prijedlozi rješenja o preuzimanju neizgrađenog gradskog građevinskog zemljišta radi privođenja krajnjoj namjeni u svrhu izgradnje saobraćajnice Hrasnička cesta po zahtjevima Pintol Muje, Dedić Senije i Sokolović Asima. Vijeće je donijelo odluke o dodjeli u zakup IV Policijskoj upravi Ilidža poslovnu zgradu u vlasništvu Općine Ilidža, o načinu i uslovima prodaje neizgrađenog gradskog građevinskog zemljišta u naselju Hrasnica, ulica Šehitluci do broja 2, o neposrednoj pogodbi za prodaju neizgrađenog građevinskog zemljišta Tunja Murisu.



Imenovan pravobranioac Općine Ilidža

Općinsko vijeće je na prijedlog Općinskog načelnika, nakon provedenog postupka propisanog zakonom za pravobranioce, na period od četiri godine, počev od 28. septembra 2015. godine imenovalo Vahidu Kovačević, dipl. pravniku iz Sarajeva koja je nakon imenovanja položila zakletvu.



Potpisan Ugovor o neposrednoj pogodbi za prodaju neizgrađenog zemljišta

Općinsko vijeće Ilidža je donijelo Odluku o neposrednoj pogodbi za prodaju neizgrađenog građevinskog zemljišta, a kojom se odobrava prodaja zbog izgradnje vjerskog objekta u ulici Hrasnička cesta 15. Tim povodom u prostorijama Općine Ilidža 18. septembra potpisan je Ugovor između Fondacije za razvoj obrazovanja koja je osnivač Internacionalnog univerziteta u Sarajevu i Općine Ilidža. Ugovor su potpisali načelnik Općine Ilidža prof. dr. Senaid Memić i predsjednik Upravnog odbora Fondacije Hasan Topaloglu.

„Hvala Općini Ilidža i njenom načelniku s kojim smo zajedno ušli u ovaj projekat. IUS je sjedište obrazovanja omladine iz različitih zemalja. Mi planiramo za ove studente kao i za građane izgraditi vjerski objekat. Gradit ćemo i srednju školu i dom za stanovanje. Nakon izgradnje džamije objekat će biti predat Islamskoj zajednici u BiH u vlasništvo kao i na upravljanje i korištenje“ izjavio je Hasan Topaloglu, predsjednik Upravnog odbora Fondacije za obrazovanje koja je osnivač IUS-a.

„Općina Ilidža ima namjeru da zajedno sa Fondacijom radi vjerski objekat na ulazu u IUS, koji neće biti namjenjen samo za studente IUS već i za turiste i naše građane. Upravni odbor će finansirati izgradnju ovog objekata, a pokretač ideje je premijer Turske Recep Tayyip Erdogan, rekao je načelnik Općine Ilidža prof. dr. Senaid Memić.

Ugovorne strane su saglasno utvrdile iznos cijene za nekretninu u iznosu od 250.000 KM za površinu 2500 kvadratna metra.

Posjeta premijera BPK Emira Okovića Općini Ilidža

Premijer Bosansko-podrinjskog kantona Emir Oković posjetio je 10. septembra 2015. godine Općinu Ilidža. Sa načelnikom Općine Ilidža prof. dr. Senaidom Memićem razgovarao je o aktualnim strateškim projektima ovog kantona.

Razmatrane su mogućnosti pružanja podrške u rješavanju infrastrukturnih i drugih projekata, kao i mogućnosti njihovog zajedničkog sufinansiranja. Oković je upoznao načelnika o stanju privrednih, infrastrukturnih i drugih tokova na području Bosansko-podrinjskog kantona, dok je načelnik Memić prezentirao aktualne projekte na području općine Ilidža.

Nabavka vozila za dijelne bolesnike jedan je od potreba ovog kantona, a načelnik Općine Ilidža prof. dr. Senaid Memić je obećao dio finansijskih sredstava za kupovinu ovog vozila koje će biti od koristi za bolesnike.



Načelnik Memić ugostio turske naučne radnike

U organizaciji Poljoprivredno-prehrambenog fakulteta Univerziteta u Sarajevu u saradnji sa dva poljoprivredna fakulteta u Turskoj, u Hotelu Terme na Ilidži održavala se „Međunarodna naučno stručna konferencija poljoprivrede i prehrambene industrije.“ Jedan od pokrovitelja ove konferencije je Općine Ilidža, a njen domaćin načelnik Općine Ilidža prof. dr. Senaid Memić je otvorio konferenciju zaželjevši uspješan rad i nadu da će iznošenje najnovijih naučnih saznanja poboljšati saradnju nauke i privrede BiH i Turske. Izlagači na ovoj konferenciji su bili predstavnici i iz Vanjsko -trgovinske komore BiH i Turske. Prema riječima dekana Poljoprivrednog fakulteta u Sarajevu Zlatana Sarića namjera konferencije je da ljudi iz BiH iz ovih oblasti dođu u kontakt s ljudima iz Turske, razmjene iskustva, te se uspostavi saradnja kako među privrednim tako i naučnim subjektima. Na konferenciji je prisutno 176 izlagača iz 12 zemalja.

Načelnik Općine Ilidža, prof. dr. Senaid Memić je 29. septembra 2015. upriličio prijem za eminentne profesore sa univerziteta iz Izmir i Burse . Upoznao je delegaciju za razvojem, potencijalom općine i budućim projektima, istakavši zadovoljstvo jer je Ilidža četvrta po razvoju u BiH.

„Nadam se da je ova konferencija samo povod da možemo dogovoriti realizaciju zajedničkih projekata jer je šteta ne iskoristiti dobru saradnju sa univerzitetima u Turskoj“ rekao je, između ostalog, načelnik Memić. Profesori sa turskih univerziteta su izrazili nadu da će konferencija doprinijeti još bolje saradnji dvije zemlje i da će rezultati biti vidljivi tek u narednom periodu. Naredne godine planirano je održavanje ovakve konferencije u Turskoj gdje su gosti pozvali načelnika Memića.





Vrtić Lužani otvara uskoro svoja vrata

„Obnova dijela vrtića u naselju Lužani trebala biti biti završena do 25. oktobra, kada bi trebale biti urađene i opremljene dvije prostorije, čajna kuhinja i dva mokra čvora. Taj prostor namijenjen je za boravak dvije odgojne grupe. Međutim, potrebno je još finansijskih sredstva kako bi vrtić bio osposobljen za boravak djece“ rekla je Jasminka Čongo, v.d. JU Djeca Sarajeva 10. septembra 2015. godine u razgovoru s načelnikom Općine Ilidža prof. dr. Senaidom Memićem, prilikom posjete ovoj općini.

„Pisani zahtjev u kojem ćete iskazati potrebe za finansijama i tačnom konstrukcijom je način na koji se ja mogu adekvatno očitovati. Naš interes jeste da vrtić što prije bude osposobljen za prijem mališana i uradit ću sve što je u mojoj moći da to bude što prije“ izjavio je načelnik Memić.

Direktorica Čongo je informisala načelniku o planovima i problemima ove ustanove u kojoj 506 mališana čeka na upis.



Potvrđen certifikat ISO 9001:2008 i standarda upravljanja okolišem ISO 14 001:2004

Stručni tim ovlaštene certifikacijske kuće TUV Adria d.o.o Sarajevo izvršio je u Općini Ilidža 29. septembra 2015. godine recertifikacijski audit, odnosno provjeru funkcionisanja i unaprijeđenja standarda upravljanja kvalitetom ISO 9001:2008 i standarda upravljanja okolišem ISO 14 001:2004 (sistem okolinskog upravljanja). Nakon provjere Općini Ilidža, potvrđen je i produžen certifikat Iso standarda.

Ovlašteni audit tim činili su, Mirsad Begić vodeći auditor za sisteme upravljanja kvalitetom, zaštitom okoline i zaštitom zdravlja i sigurnosti na radu iz certifikacijske kuće TUV Adria d.o.o. Sarajevo i Danijela Moranjkić. Na uvodnom sastanku u ime Općine Ilidža audit timu je zaželjela uspješnu provjeru Velida Memić sekretar općinskog organa uprave.

Na završnom sastanku, vođa tima Mirsad Begić je prezentirao rezultate provjere provedene u općinskim službama. Begić je ocijenio da se ova dva sistema održavaju kvalitetno i funkcionalno što dovodi do izuzetne usluge svim građanima. Čestitao je načelniku Općine Ilidža prof. dr. Senaidu Memiću na kvalitetnom timu uposlenika koji su radili u ovoj oblasti, a posebno PR za ISO standard Mirsadi Hadžić i menadžeru Centra za pružanje usluga građanima Mirsadi Kajan.

„Vi ste vrlo dobro organizovana općina. Nakon onoga što sam vidio vi ste među prvima. Nismo našli nijednu neusklađenost i jedino imamo nekoliko preporuka, a želimo da i u budućnosti budete tako uspješni“, rekao je Begić.

Naredna provjera certifikata ISO 9001:2008 i standarda upravljanja okolišem ISO 14 001:2004 je sljedeće godine.



Općina Ilidža finansijski podržala otvorenje Zemaljskog muzeja

Vrata Zemaljskog muzeja BiH koji je bio zatvoren skoro pune tri godine 15. septembra svečano su otvorena i to skidanjem daski sa ulaznih vrata, što su učinila djeca sarajevskih osnovnih škola. Prije same ceremonije otvaranja Muzeja, u zgradi Parlamentarne skupštine BiH potpisan je Memorandum o razumijevanju koji bi trebao doprinijeti rješavanju pitanja finansiranja sedam institucija kulture koje su od državnog značaja za Bosnu i Hercegovinu. Memorandum je potpisalo 35 predstavnika svih nivoa vlasti u Bosni i Hercegovini, od općinskog nivoa, preko kantonalnog i federalnog, do državnog - Vijeća ministara Bosne i Hercegovine.

Sporazum podrške potpisao je i načelnik Općine Ilidža prof. dr. Senaid Memić.

Inicijator Memoranduma bilo je Ministarstvo civilnih poslova Bosne i Hercegovine, koje na ovaj način želi riješiti finansiranje institucija kulture za period od 2016. do 2018. godine.

Svečanom otvorenju ove važne kulturne institucije, koja čuva veliko nacionalno bogatstvo, prisustvovali su predstavnici državne, entitetske i kantonalnih vlasti, diplomatskog kora, kulturnog života i civilnog društva, akademske zajednice i brojni građani.




Uskoro počinje gradnja zgrade za neprofitno socijalno stanovanje

„Općina Ilidža ispunila je kriterije u Regionalnom projektu –treći talas izgradnje zgrade za neprofitno socijalno stanovanje“, rekla je Sejda Topalović, pomoćnica načelnika za rad, socijalna pitanja, zdravstvo, izbjeglice i raseljena lica

„U ovom projektu mi imamo obavezu da obezbijedimo zemljište, što je već urađeno, građevinsku dozvolu, kao i saglasnosti za izgradnju 18 stanova. Objekat bi se trebao graditi u ulici Suvada Đulimana, tzv. naselje Balvangrad“ naglasila je Topalović.

Općina Ilidža je u fazi procedure odabira potencijalnih korisnika stambenih jedinica. Javni poziv je bio raspisan od 15. augusta do 2. septembra 2015. Na ovaj poziv javilo se 28 porodica. Projekat podrazumijeva smještaj porodica koje bi plaćale minimalni iznos najma po metru kvadratnom i stanari bili bi u obavezi plaćanja komunalija (vode, struje, telefona.)



Treća faza izgradnje saobraćajnice Ilidža-Hrasnica

Započela je treća B faza izgradnje saobraćajnice sa tramvajskim pojasom Ilidža –Hrasnica. Izvođač je firma Bosman d.o.o za građevinske radove, a Testingelektro d.o.o angažovan je za radove javne rasvjete. Nadzor vrši Zavod za izgradnju Kantona Sarajevo. Ugovorena vrijednost radova sa Bosmanom je 1.221.555,17 KM, a sa Testingelektrom d.o.o. je 89.358,75 KM. Do sada je urađena dionica u dužini 430 metara. Nakon riješenih imovinsko-pravnih odnosa izvođač Bosman započeo je 200 metara trase.

Trenutno se radi široki iskop i zamjena podla. Rok završetka radova je 10 mjeseci. U 2015. godini planirano je da se urade građevinski radovi, a na proljeće 2016. godine asfaltni radovi. Finansijer je Općina Ilidža.



Započela regulacija vodotoka Dobrinje

Na području općine Ilidža, u MZ Stup II iza prodajnog centra nekadašnjeg Interex-a, započela je osma faza regulacije korita vodotoka Dobrinje. Vrijednost radova je 197.421,65 KM, a izvođač je firma Orman d.o.o Kiseljak. Radove finansira Općina Ilidža.



Nove sportske plohe u Sokolović-Koloniji i Hipodromu

U MZ Sokolović-Kolonija pored nove saobraćajnice uz rijeku Željeznicu izgrađena je sportska ploha i u MZ Butmir sanirana je postojeća ploha (naselje Hipodrom). Općina Ilidža je za ove radove izdvojila 66.364,41 KM, a izvođač je bila firma Babel d.o.o Sarajevo.



Položeno cvijeće na mezarje Kerima Džafića

U okviru obilježavanja 23. godišnjice Prvog motorizovanog bataljona-Četvrte viteške brigade, delegacija Općine Ilidža 17. septembra 2015. godine obišla je i položila cvijeće na spomen-obilježje komandantu bataljona Kerimu Džafiću.

Nakon toga delegacija je obišla i šehidsko mezarje Kovači-Hrasnica. Obilaskom mezarja i učenjem Fatihe odata je počast svim poginulim šehidima i braniteljima. U Domu kulture u Hrasnici održana je svečana akademija.



Obilježena godišnjica pogibije sestara Rahman

U Hrasnici u ulici Sabita Užičanina na broju 15, 7. septembra je obilježena 23. godišnjica pogibije dviju sestara, djevojčica od 14 i 16 godina, Samire i Jasne Rahman. Sestre Rahman su ubijene 7. septembra 1992. u ranim jutarnjim satima dok su spavale u stanu. Obilježavanju su prisustvovali prijatelji porodice Rahman, komšije, predstavnici Općine Ilidža i škola iz Hrasnice, koji su na mjestu stradanja djevojčica proučili Fatihu.

Predsjednik Udruženja roditelja ubijene djece Sarajeva Fikret Grabovica je kazao da je pogibija sestara Rahman primjer da zločinci tokom rata nisu štedjeli ni djecu koja su svakodnevno stradala dok su se igrali, doručkovali.

“Mladi nikad ne smiju zaboraviti šta se desilo ovdje, dok stariji stalno trebaju podsjećati da se nikad ne zaboravi i ne ponovi” dodao je Grabovica.



Obilježena 23. godišnjica odbrane Otesa, Dogloda, Stupa, Azića i Bara

U prisustvu saboraca, članova porodica, prijatelja, sugrađana, učenika, te predstavnika Općine Ilidža i boračkih udruženja, a u organizaciji Udruženja organizatora otpora veterana rata, dobrovoljaca, prvoboraca i branilaca „Zelene beretke“ i Općine Ilidža, 11. septembra 2015. godine obilježena je 23. godišnjica odbrane Otesa, Dogloda, Stupa, Azića i Bara polaganjem cvijeća ispred spomen-obilježja na platou ispred mjesne zajednice Otes, gdje je održana i centralna manifestacija. Prisutni su se prisjetili tih teških, ali i herojskih ratnih dana kada se vodila jedna od najtežih bitaka za odbranu ovih, izuzetno strateški važnih prostora. Prigodan kulturno-umjetnički program priredili su učenici Treće osnovne škole.



Sretno, prvačići

Prvi dan nove školske 2015/2016. godine, koja je počela 1. septembra protekao je u znaku dobrodošlice prvačićima, a obilježen je svečanim prijemom u svim ilidžanskim osnovnim školama, za koje su učenici starijih razreda priredili prigodan program. U 11 osnovnih škola na području općine Ilidža u dva upisna roka u prvi razred upisano je ukupno 698 đaka. I ove godine, tim povodom, Općina Ilidža je darovala poklon-paketiće svim prvačićima, u kojima je slovarica, brojan-ka, čestitka i eko kesa.

U Arhivi uveden sistem „Aerosolom“

Ucilju poboljšanja zaštite arhivske građe koja je smještena u posebnim prostorijama Općine Ilidža uveden je stabilni sistem za gašenje požara „Aerosolom“.

U Arhivi Ilidže, koja prema ocjenama stručnjaka, predstavlja jednu od najsavremenijih u Kantonu Sarajevo i šire, nalazi se arhivska građa u potpuno sređenom stanju, sortirana u pokretnim gondolama što omogućava brzo i efikasno pronalaženje predmeta.



U augustu ovjereno 36.314 fotokopija i 4.131 potpis

Utoku ljetnih mjeseci u Općini Ilidža u Centru za pružanje usluga građanima obratio se enormno veliki broj građana, kako za ovjeru različitih dokumenata tako i za izdavanje izvoda iz matičnih knjiga i upisa u matične knjige, posebno za upise u matične knjige na osnovu isprava inozemnog organa. To nam je potvrdila Mirsada Hasečić, pomoćnica načelnika za opću upravu.

Prema njenim riječima u augustu je ovjereno 36.314 fotokopija dokumenata i izvršena ovjera 4.131 potpisa na raznim ispravama kao što su izjave, punomoći i slično. Izvršena je također ovjera 33 dokumenta za nepokretna lica u njihovim domovima.

„Od 1. jula do 1. septembra 2015. godine ukupno je izdato 5.748 izvoda iz matičnih knjiga, a izvršeno je 338 upisa u matičnu knjigu, jer se po novom zakonu upisi novorođenog djeteta vrše po prebivalištu majke, a upisi u matičnu knjigu umrlih po prebivalištu umrlog.“

Prema procjenama, kako je rekla Hasečić, u Centru je dnevno opsluženo više od hiljadu građana.

Pomoć porodici Karamujić

Na sastanku Sindikalne organizacije Općinskog Organa uprave Ilidža donesena je 22. septembra odluka o pomoći porodici Kenajida Karamujića u iznosu od 500 KM. Radi se o porodici koja ima četvero djece i u kojoj su svi članovi gluho-nijemi. Delegacija je 23. septembra obišla porodicu u Zeniku u Rakovici uručila im pakete sa hranom i higijenskim potrepštinama kao i ogrijev za zimu. Svi građani koji žele pomoći ovoj porodici mogu se javiti sekretaru MZ Rakovica.





Asfaltiranje na području općine Ilidža

Na području općine Ilidža završeno je asfaltiranje sedam ulica. Za ove radove iz Budžeta je izdvojeno 322.000 KM.

U MZ Hrasnica 1 sanirana je ulice Kerima Džafića u dužini 70 metara i širini tri metra. Investitor u iznosu 11.000 KM je Općina Ilidža. Radove su izvodili radnici firme "Mevludin Commerce" d.o.o. Sarajevo. U ovoj mjesnoj zajednici završeni su radovi asfaltiranja ulice Derviš paše Bajezidagića u dužini 277 metara i širini pet metara. Investitor je Općina Ilidža, a izvođač radova je Mevludin Commerce d.o.o. Sarajevo. Vrijednost radova iznosi oko 100.000 KM. Završeno je i tamponiranje ulice Zeleni put u dužini 1220 metara i širini osam metara. Općina Ilidža je za ove radove izdvojila 80.000 KM, a posao je bio povjeren firmi Mevludin Commerce d.o.o. Sarajevo. Okončana je rekonstrukcija ulice Osik do broja 186 u MZ Osjek u dužini 120 metara i širini tri i po metra. Investitor radova je bila Općina Ilidža i građani u iznosu 11.000 KM, a KJKP "Rad" d.d. Sarajevo je bio izvođač. Urađen je i asfalt u ulici Osik do broja 99 u dužini 240 i širini tri i po metra. Vrijednost radova iznosila je 26.000 KM, a izvođač je bila firma KJKP "Rad". U ovoj MZ asfalt su dobili i stanovnici ulice Mekote u dužini dužini 70 metara i širini tri metra. Investitor je bila Općina Ilidža (70 posto) građani (30 posto). Općina je izdvojila 7.000 KM, a radove je izvodila firma KJKP "Rad" d.d. Sarajevo.

Asfaltirana je i ulica Tuneli u Donjem Kotorcu u dužini 90 metara i širini tri i po metra. Općina Ilidža učestvovat će sa 70 posto a 30 posto građani. Izvođač radova bila je firma Mevludin Commerce d.o.o. Sarajevo. Općina Ilidža finansirala je ove radove u iznosu 7.000,00 KM. U MZ Sokolović-Kolonija uradio se i asfalt u ulici Jusufa Bublina u dužini 425 i širini pet metara. Izvođač radova je firma KJKP "Rad" d.d. Sarajevo. Vrijednost radova iznosi 80.000 KM, a investitor je Općina Ilidža.

Puštena u rad javna rasvjeta u naselju Kakrinje-MZ Rakovica

U okviru projekta za izgradnju javne rasvjete po mjesnim zajednicama općine Ilidža, 9. septembra 2015. godine puštena je u rad novoizgrađena javna rasvjeta u naselju Kakrinje-MZ Rakovica. Postavljeno je 26 svjetiljki sa mjernim ormarom u dužini od oko 1200 metara čime je osvijetljeno kompletno naselje. Vrijednost izvedenih radova je 20.000 KM, a investitor je Općina Ilidža. Izvođač radova je Testing elektro, dok je nadzor na radovima vršio Zavod za izgradnju Kantona Sarajevo.



Obavještenje za poljoprivrednike

Obavještavamo građane da je na osnovu člana 13. Zakona o novčanim podrškama u poljoprivredi i ruralnom razvoju ("Službene novine Federacije BiH", broj 42/10), kao i člana 6. Pravilnika o načinu i uslovima ostvarenja novčane podrške po modelu poticaja proizvodnji ("Službene novine Federacije BiH", broj 60/14), propisano da su klijenti dužni da nadležnom kantonalnom ministarstvu najkasnije do 15. novembra tekuće godine izvrše prijavu plana proizvodnje za koju očekuju podršku u narednoj 2016. godini, na obrascu PPP.

Ovo je osnovni uslov za ostvarivanje prava na podsticaj za proizvodnje po federalnom zakonu. Obrazac prijave plana proizvodnje (PPP) se može preuzeti u prostorijama MZ -a, Općine (soba 324), web stranici Općine Ilidža, prostorijama Stručne poljoprivredne službe Kantona Sarajevo, Butmir ul. Butmirska cesta br. 40, i protokolu Kantona Sarajevo, gdje se i predaju popunjeni obrasci.





Nučite pisati projekte prema standardima Europske unije



Udruženje „Svitanje“, Sarajevo u saradnji sa Općinom Ilidža, planira realizaciju projekta „Pisanje projekata prema standardima Europske unije“, koji će se održati u vidu seminara sa radionicama.

Tako će se 10.10.2015., 11.10.2015. i 24.10.2015. godine, na teritoriji općine Ilidža, održati besplatan seminar na temu „Pisanje projekata prema standardima Europske Unije“. Prednost pri prijavi imaju stanovnici Općine Ilidža, ali ohrabrujemo i pripadnike drugih općina da apliciraju. U periodu održavanja seminara, obezbjeđena je mogućnost online konsultacija.

Imate dobru ideju, ali mislite da je nikada nećete ostvariti, jer ne možete nabaviti potrebna novčana sredstva za njenu realizaciju? Nakon ovog seminara, moći ćete samostalno napisati i osmisлити dobar projektni prijedlog, razviti ćete sposobnost da izbjegnute najčešće greške koje se javljaju pri pisanju projekata i naučiti ćete kako da vaš projekat učinite atraktivnim za donatora.

Seminar je namijenjen svim zainteresovanim, starosti 17-26 godina. Rok za prijave je 08.10.2015. Broj mjesta je ograničen. Za dodatne informacije, pratite facebook stranicu Udruženja „Svitanje“. Online prijavu možete popuniti na sljedećem link:

<https://docs.google.com/forms/d/1kZjbxOArebUC13jaPhZ3PPS6yCIKLBEDrY06IQYjWw8/viewform?c=0&w=1>



“U susret Bajramu”

U organizaciji ilidžanska grupe „Sevdah ashk groove“a pod pokroviteljstvom Općine Ilidža 22. septembra u Multimedijskoj sali održan je koncert sevdaha “U susret Bajramu.”

Ansambel „Sevdah Ashk Groove“ osnovan je u decembru 2014. godine s ciljem očuvanja i promocije sevdalinke kao nacionalnog blaga naroda Bosne i Hercegovine. Članovi ansambla su vrsni muzičari koje je ujedinila ljubav prema tradicionalnoj muzici i želja za očuvanjem sevdalinke kao neprolazne vrijednosti. Umjetnički rukovodilac ansambla je prof. mr. Munir Mešanović harmonika, a njegovi članovi su Eldin Bihorac gitara, Sanin Čosović bubanj, Nermin Rizvić harmonika, Amar Karahmet vokal i Osman Abdelmukaram bas gitara.

Koncert je prošao u ugodnoj atmosferi, a publika je uživala u izvedbi najpoznatijih tradicionalnih sevdalinki.



Humanitarna izložba ručnih radova

Udruženje „Zlatna ruka“ Ilidža u holu zgrade Općine Ilidža 17. i 18. septembra 2015. godine organizovalo je izložbu ručnih radova. Vrijedne aktivistice ovog udruženja izložile su ručno tkate bosanske serdžade, ćilime, vez, kožnu galanteriju, pletene odjevne predmete, heklane garniture i slike rađene u aluminskoj foliji. Izložba je bila prodajnog karaktera, a prihod od prodaje namijenjen je za bajramske pakete djeci bez roditelja.

Podrška Općine Ilidža Udruženju dijabetičara Kantona Sarajevo

Udruženje dijabetičara Kantona Sarajevo je u prostorijama Općine Novi Grad organizovalo promociju i podjelu novog broja časopisa „Bolji život“ i početak jesenjeg programa edukacije za dijabetičare. Među prisutnima je bio i načelnik Općine Ilidža prof. dr. Senaid Memić koji je podržao program rada ovog Udruženja kroz akcije besplatnog mjerenja šećera u krvi u dvije apoteke na području općine Ilidža s ciljem ranog otkrivanja prvih simptoma šećerne bolesti. Pored toga, Općina je podržala i izdavanje časopisa „Bolji život“ koji će se distribuirati među najmlađom populacijom, učenicima u osnovnim i srednjim školama.

„Ovom prilikom želim da se u ime Udruženja dijabetičara Kantona Sarajevo zahvalim Općini Ilidža i njenom načelniku gospodinu Senaidu Memiću na podršci našem Udruženju“ kazala je Alma Dervišbegović sekretar Udruženja.





Edin Sinanović osvojio bronzanu medalju na Evropskom prvenstvu

Edin Sinanović, takmičar Kick-boxing akademije „Ilidža“ i juniorski reprezentativac BiH osvojio je bronzanu medalju na Evropskom prvenstvu za juniore održanom u San Sebastijanu u Španiji.

„U izuzetno teškoj konkurenciji ostvario je dvije pobjede i u trećoj borbi poražen je od Azerbejdžanca. Ovo je potvrda kontinuiranog rada u klubu, a radi se o jednom od najtalentovanijih juniora u BiH, rekao nam je trener Nermin Bašović.



Meris Muhović osvojio bronzu

Meris Muhović član KK Champion na Karate Premier ligi održanoj 27. septembra u njemačkom Coburgu osvojio je treće mjesto u kategoriji do 84 kg. Muhović je pokazao odličnu formu, te će u narednom periodu još spremnije dočekati seniorsko državno prvenstvo, a zatim i nastupe na Balkanskom i Evropskom prvenstvu.

Muhović je 2014. godine u Tampereu osvojio 3. mjesto na Evropskom prvenstvu, a nedugo poslije toga se povrijedio te je sa borilišta odsustvovao više od 9 mjeseci.

Nastupom u Njemačkoj pokazao je da je vratio staru formu i pravac kojim ide njegova sportska karijera.

“Trči s ciljem prema cilju”

Usuradnji sa NGO Maraton Sarajevo, Institut za razvoj mladih KULT i Obrazovno-razonodni centar za mlade SPAJALICA su pokrenuli kampanju “Trči s ciljem prema cilju”. Kampanja je imala za cilj da promovira Školu prijateljstva i Spajalicu te potakne mlade na fizičku aktivnost i brigu o svom zdravlju. Kroz kampanju je vršena i prodaja bonova u vrijednosti od 10, 20 i 50KM, a sva prikupljena sredstva su donirana Spajalici za realizaciju projekata koji će biti usmjereni na promociju zdravih životnih stilova kod djece i mladih.



Vrijedni aktivisti Crvenog križa promovišu Općinu Ilidža

Povodom Sedmice borbe protiv tuberkuloze koja se obilježava od 14. do 21. septembra organizovane su aktivnosti s ciljem promocije zdravlja i zdravog načina života. U Prvoj osnovnoj školi održano je predavanje za više od stotinu učenika na temu prevencije, simptoma i liječenja tuberkuloze. Održana je i akcija dobrovoljnog darivanja krvi, a u saradnji sa Domom zdravlja Ilidža oboljelima od TBC - a su uručeni paketi pomoći. Volonteri su u toku te sedmice na ulicama Ilidže distribuirali prigodni promotivni materijal. Ekipe Crvenog križa Ilidža je predstavljala Bosna i Hercegovina na Evropskom takmičenju iz prve pomoći koje se održalo u Bukureštu (Rumunija) u periodu od 10. do 13. septembra 2015. Ove godine ekipa je dostojanstveno predstavila BiH, te zauzela sedmo mjesto u konkurenciji 28 zemalja. U septembru je realizovan projekat pod nazivom “Prva pomoć”. Ovaj projekat je imao za cilj podizanje svijesti građana o poznavanju prve pomoći, a sastojao se iz tri dijela: anketiranje građana Ilidže o poznavanju i spremnosti da pruže prvu pomoć, pokazna vježba sa isceniranom nesrećom, te edukacija iz prve pomoći. Edukacija je bila javnog karaktera i mogli su prisustvovati svi građani zainteresirani da nauče prvu pomoć.





SLUŽBA ZA OBRAZOVANJE, KULTURU,
SPORT I INFORMISANJE

EDUCATION, CULTURE, SPORT AND
PUBLIC RELATION DEPARTMENT

Na osnovu člana 6. Pravilnika o stipendiranju talentovanih učenika i studenata ("Službene novine Kantona Sarajevo", broj 39/13), Općinski načelnik Općine Ilidža na prijedlog Službe za obrazovanje, kulturu, sport i informisanje raspisuje

KONKURS

za stipendiranje talentovanih učenika u srednjem i studenata u visokoškolskom obrazovanju u školskoj/ akademskoj 2015/2016. godini

Pravo učešća na Konkursu za stipendiranje u školskoj/akademskoj 2015/2016. godini i dodjelu stipendije imaju učenici i studenti koji zadovoljavaju i ispunjavaju slijedeće kriterije i to:

- a) da su državljani Bosne i Hercegovine;
- b) da imaju prebivalište na području općine Ilidža;
- c) da su redovni učenici javnih ustanova srednjih škola Kantona Sarajevo i redovni studenti visokoškolskih ustanova (fakulteti/akademije) članica Univerziteta u Sarajevu;
- d) da su u prethodnoj školskoj/akademskoj godini (2014/2015.) imali slijedeći uspjeh u školi, odnosno fakultetu i to:
 1. učenici prvih razreda srednjih škola koji su od trećeg do devetog razreda osnovne škole imali prosječnu ocjenu 5,0 i ocjenu iz vladanja primjerno,
 2. učenici drugog, trećeg i četvrtog razreda srednjih škola koji su u prethodnom razredu ostvarili prosječnu ocjenu 5,0 i ocjenu vladanja primjerno,
 3. redovni studenti prve godine studija koji su u završnom razredu srednje škole imali prosječnu ocjenu 5,0 i ocjenu iz vladanja primjerno, te da nisu obnovljali godinu,
 4. redovni studenti tehničkih fakulteta (arhitektonski, građevinski, elektrotehnički, mašinski, fakultet za saobraćaj i komunikacije), medicinskog fakulteta i srodnih fakulteta (stomatološki, farmaceutski, veterinarski i fakultet zdravstvenih studija) sa prosjekom ocjena iz prethodne godine studija najmanje 7,5 i redovni studenti ostalih fakulteta sa prosjekom ocjena najmanje 8,0, koji nisu obnovili godinu,
- e) da nisu ostvarili pravo na stipendiju u školskoj/akademskoj 2015/2016. godini po osnovu uspjeha u učenju od javnog sektora (općine, grad, kanton, FBiH, BiH i fondovi).

Apsolventi nemaju pravo na stipendiranje.

Stipendija se dodjeljuje za školsku/akademsku 2015/2016. godinu i isplaćivat će se 10 mjeseci.

Uz ispunjenu prijavu na Konkurs (obrazac prijave može se preuzeti u Centru za pružanje usluga građanima Općine Ilidža ili na www.opcinailidza.ba) kandidati trebaju dostaviti slijedeće:

1. Uvjerenje o državljanstvu BiH,
2. Prijavu mjesta prebivališta,
3. Potvrdu o upisu u školsku/akademsku 2015/2016. godinu kao redovan učenik- student,
4. a) Dokaz o uspjehu sa prosjekom ocjena od trećeg do devetog razreda osnovne škole za učenike prvog razreda srednje škole,
- b) dokaz o uspjehu sa prosjekom ocjena u školskoj 2014/2015. godini za učenike drugog, trećeg, četvrtog razreda srednje škole i studente prve godine studija,
- c) uvjerenje o prosjeku ocjena u akademskoj 2014/2015. godini za studente druge, treće, četvrte, pete i šeste godine studija.

Sva dokumenta koja se dostavljaju kao dokaz o ispunjavanju uslova moraju biti originali ili ovjerene fotokopije, te ne smiju biti starija od 6 mjeseci.

Dokumenta dostavljena uz prijavu na Konkurs se ne vraćaju.

Rok za podnošenje prijave je 15 (petnaest) dana od dana objave Konkursa. Prijave sa dokazima o ispunjavanju uslova Konkursa dostaviti u Cenar za pružanje usluga građanima Općine Ilidža ili putem pošte na adresu: Općina Ilidža, Butmirska cesta 12, 71210 Ilidža.

Nepotpune i neblagovremene prijave neće biti razmatrane.

Sve dodatne informacije mogu se dobiti u Službi za obrazovanje, kulturu, sport i informisanje Općine Ilidža, Butmirska cesta 12 (telefon 775-717, 775-718 i 775-720).

OPĆINSKI NAČELNIK

Prof. dr. Senaid Memić